

OTANOK ETA ARDANZAK ATZO SINATU ZUTEN IRUÑEAN HITZARMEN MARKOAREN TESTUA

EITBren erabateko hartzea heldu diren hiru urteetan gauzatuko da

Javier Otano presidenteak eta Jose Antonio Ardanza lehendakariak atzo sinatu zuten EITB Nafarroan hartzea ofizialki ahalbidetzen duen hitzarmen markoa. Proiektuaren kostu osoa 940 milioikoa (37,6 milioi libera) izanen da.

Irene Arrizurieta / Iruñea

NAFARROAKO Javier Otano presidentek eta Euskal Autonomi Elkarteko (EAE) Jose Antonio Ardanza lehendakariak atzo arratsaldean Nafarroako Jauregian sinatutako hitzarmen markoaren oinarrian, bi administrazioek kultura gordetzeko ardura nabarmentzen dute EITBren emisioa baimentzeko.

Jakina denez, Foru Parlamentuak, 1993ko ekainaren 30ean Nafarroan ordura arte ez ofizialean egiten zen EITBren emisioa modu ofizialean ezartzeko eskatu zion Gobernuari. Bide honi jarraituz, Nafarroako Gobernuak Gasteizkoarekin hitzartu beharreko elkarlanerako protokoloa prestatu zuen eta 1995eko ekainean onartu. Baina bi aldeek hauteskundeak zirela-medio ez zuten arestian aipatu akordioa hitzartu. Hala ere, hiruko Gobernuaren etorrerarekin hitzarmena konbenio moduan egin da, bai Nafarroako eta bai EAEko legebiltzarrek testua onartu ondoren.

Azpiegituraren finantzaketa zehaztu gabe dago • Otanok eta Ardanzak, akordioa sinatu ostean, atzoko eguna pozik egoteko zela azpimarratu zuten. Lehendakariak sinatutako akordioa «aspaldiko ametsa betetzea» dela erran zuen. Ildo beretik, orain juridikoki ongi oinarrituta



Javier Otano presidentea eta Jose Antonio Ardanza lehendakaria Nafarroako jauregian egindako sinaketan.

JOXE LACALLE

egin den sinatzeak elkarlanean jarraitzeko bidea uzten duela azpimarratu zuen. «Garrantzitsua da gure arteko harremanak sendotzen joateko. Etorkizunari begira gaude eta aurrerantzean aberasgarriagoa izanen dela uste dugu». Hala ere, oraindik argitu gabe dago zeinek ordainduko dituen EITBren hedapena erabatekoa izan dadin azpiegitura jartzeko behar diren 940 milioi pe-

zetak eta bere aspektu teknikoak. Ardanzak azaldu zuenez, arazo teknikoei eta gastu ekonomikoei aurre egiteko akordioak iristeko prest daude. Horretarako erabiliko dute hitzarmenaren jarraipena egiteko eratu den bitariko batzordea. Aipatu batzordeak hitzartutakoa ongi betetzen den aztertuko du eta okerrak zuzentzeko neurriak proposatuko ditu. Horiek zazpi egunetan

agindutakoa betetzen ez badute, hitzarmena bertan behera utzi ahal izango du beste aldeak.

EITBren instalakuntza guztiak hiru urteko epean paratuko diren arren, behin-behinekoak hiru edo gehienez lau hilabetetetan ezarriko dira, EITBk baduelako azpiegitura egina herrialdean. Garrantzitsuena San Kristobalen jarriko den errepikagailua izanen da, horrek 250.000 lagun ingururi —Iruñeri osoa— EITB behar bezala ikusteko aukera emanen baitie.

Atzo hitzartutakoa eztabaidarako bidea ere izan da, ezker abertzaleak behin baino gehiagotan kritikatu baitu testuan Nafarroa Euskal Herriaz bestelako errealitate gisa agertzea. Testuaren arabera, EITBk herrialdeko sinboloak onartu beharko ditu eta Nafarroa Euskal Herritik at dagoen lurralde gisa aurkeztu beharko du, grafiko, testu eta deskripzioetan. X

Gaua komisaldegian igaro ostean EHUKo hiru irakasle kaleratu aske

■ **Zalakain:** «Gure kontrako beste gehiegikeri eta basakeria bat da»

Gorane Agirre / Bilbo

GAUA Erandioko komisaldegian igaro eta Getxoko epailearen aurrean deklaratu ostean, Jesus Mari Zalakain, Antton Azkargorta eta Jose Luis Herrero Euskal Herriko Unibertsitateko (EHU) irakasle kaleratuak aske geratu ziren atzo eguerdian.


Hiru irakasleak joan den asteartean atxilotu zituen Ertzaintzak Leioako kanpusean. «Agintaritzari desobedientzia larria» leporatuz izan ziren atxilotuak kaleratuak.

Jesus Mari Zalakain irakasleak «gehiagikeritza» jo zuen Unibertsitateak beraien aurka hartutako neurria. «Agintari unibertsitariok arrazoi bakartzat errepresioa daukate. Hiru urte daramatzagu gure eskubideak urratu zituzten uneari buruzko elkarrizketa eske eta orain arte jaso dugun erantzun bakararra errepresioa izan da. Atzokoa —asteartekoa— beste basakeria bat da, erantzule zuzen batzuk dituen».

«Errektorea bera eta beste batzu», gehitu zuen, «behin eta berrito ari dira esaten edozer gauza eska daitekeela baktetsuki. Baina gu erakusten ari gara hori eginda ere, ez dutela arazoaren mamia konpondu nahi. Ondorioz, horrelako sasi-agintaritzak salatzen dugu, EHUK ez du merezi horrelakorik».

Irakasle honek azpimarkatu zuenez, urteetan luzatzen den arazo hau «erabat politikoa» da. «Auzi honetan Unibertsitateko agintariak nolabait mikroesperimentazio bat egiten ari dira gure gaiarekin. Guk isladatzen ditugun eskariak nolabait errailetatik ezabatu nahi dituzte».

Bestalde, Enrique Lopez irakasleak 23 egun betetzen ditu gaur gose greban. Hamar kilo baino gehiago galdu dituen irakasleak gose greba mugagabearekin jarraitzeko asmoa du «ahul eta nekatuta» sentitzen bada ere. X



Expoconsumo-Expovacaciones zabalik

Aurtengo Expoconsumo eta Expovacaciones feriek atzo goizean zabaldu zituzten beren ateak. Rosa Díez Eusko Jaurlaritzako Turismo eta Kontsumo sailburuak inauguratu zituen bi azoket guztira 450 erakusle bilduko dituzte igandera arte. Díez-en hitzetan, «feria hau Europako garrantzitsuenetakoa eta Espainiako bigarrena da. Turistikoki hain garatuak dauden herrialdeak hemen izateari esker sektoreko onenekin lehia gaitzeko etxean, eta hau bikain gairatuko dugun erronka da».



IRUNGO UDALA

IRAGARKIA

KULTUR ERAKUNDEEK ETA GAZTE ELKARTEEK BULTZATURIKO EKINTZEN PROGRAMEI EMATEN ZAIZKIEN DIRU-LAGUNTZAK ESKATU ETA JASOTZEKO ARAUAK EZARTZEN DITUZTEN OINARRIAK

1.996.

(Udal Gobernu Batzordeak 1996ko apirilaren 3ko bilkuran hartutako erabakia).

Eskarien aurkezpena. Irungo Udaleko Erregistro Orokorrean aurkeztu beharko dira, epea 1.996ko apirilaren 30ean itxiko da.

Deialdiaren oinarriak. Interesatuen eskura daude Udaletxe honetako Erregistro Orokorrean (San Juan Harria enparantza) eta Hezkuntza, Kultura, Gazteria eta Kirol Arloan (Urdanibia Enparantza).

Irun, 1996ko apirilak 10. ALKATEA.